

沈氏弋說

沈氏弋說卷之四

武林沈長卿幼宰 著

蕭山黃可師大年

同邑卓爾康去病

沈守正無回

聞啓祥子將

徐如珩楚白 全評

逍遙遊說

莊生與世之桎梏者解其天殲而通篇立論之旨總欲破斯人拘攣之見以廣之蓋世之人知有所域則動有所礙礙則不能遊方之外安得逍遙逍遙云者卽聖人智者樂之義也智者見大陶陶于天地萬物之表以自適愚者見小局于非譽榮辱之中而不快小大二字切中古今膏肓之病當時惠子以堅白鳴正硜硜之小人也彼自負用世之才視莊生爲迂濶若曰我

雖小實有用。汝雖大却無用。然此人不可與之  
深言。只就形質上較論一番。以醒其迷足矣。故  
設爲大瓠大樗二喻。以見我之大非大而無當。  
乃大而有用者也。此是惠子笑莊子處。篇中蜩  
與鷺鴦笑之。斥鴳笑之以小笑大。宋榮子猶然  
笑之以大笑小。輾轉相笑。所謂下士聞道大笑  
之。不笑不足以爲道也。且逍遙各因其量。榆枋  
決起。蜩與鷺鴦之逍遙也。翱翔蓬蒿之間。斥鴳

之逍遙也。徙必于天池。搏必九萬里之高。息必六月之久。鯢鵬之逍遙。真逍遙也。處勢湫隘者。難與測寥廓之觀。祇因其狃耳目聞見。以自圉。而知識束而不開。自封自局。故又以小年不及大年。況小知不及大知。朝菌之外。有蟪蛄。蟪蛄之外。有冥靈。冥靈之外。有大椿。以彭祖而埒大椿。與鳩鵲之笑鯢鵬。何異物。豈無壽于大椿。鉅于鯢鵬者哉。其相笑亦若是耳。愚人開口便要。

笑人。只因他胸中凡陋。以爲道在是矣。而不知道中更自有道。道外無往非道。彼一官一鄉一君一國之與天下。大小遞分。沾沾自多。不足當宋榮子之一笑。豈不可鄙。可賤。可悲。可憐。等而上之。宋榮子之外有列子。列子之外有堯。堯之外有許由。許由之外有藐姑射之神人。至于物不疵厲而年穀熟。堯舜所焦勞而猶病者。但一凝神而有餘。其塵垢糠粃直陶鑄之矣。何者。神

人調六合于一身。堯舜以一身調六合。分量不  
霄壤哉。世人眼界褊窄。以堯舜地位無復可加。  
聞神人作用。不啻夏虫井蛙之疑冰與海心。竊  
笑之。自此以外。愈夫而愈。不可方物。凡史冊所  
不載。人世所不經見者。曷其有極。豈豎儒所及  
知乎。其神凝三字。正以無用爲有用。也不龜手  
之藥。以技用者也。大用之。則不止爲泝澣。統而  
裂地定封。五石之瓠。擁腫卷曲之樗。以形用者。

也。大用之。而浮于江湖。則不憂瓠落樹于廣莫。  
無何有之鄉。則彷徨寢臥安所困苦。况凝神者。  
以無用爲有用。天下有不治乎。此所以能逍遙  
也。聞言驚怖。河漢無極。乃肩吾告連叔之詞。而  
齊諧問棘各有所據。莊子不自立論。恐世人疑  
其言之無稽。狂而不信也。其大旨欲治天下者。  
與一世相澹漠焉。以還于無懷葛天之盛。彼皇  
帝王伯渺乎小矣。後世詆莊周爲道家之儀秦。



而曲學以異端排之。猶鳩鳩之笑鯤鵬亦小且愚矣。夫愚莫愚于自以爲靈。而靈莫靈于自以爲愚也。小莫小于自以爲大。而大莫大于自以爲小也。惟大智乃能用大。超塵埃猥瑣之外。而放達于玄同之門。以遊于無垠。欲不逍遙得乎。徐楚白先生評○鸞鳩斤鳩亦有逍遙大椿鯤鵬未爲壽鉅可謂善讀莊子

聞子將先生評○自大乘聖人看之。通體是苦。

卽使漆園現身住世安得逍遙

齊物論說

人情之所護惜者我也。寬假者我也。縱恣屑越者亦我也。有我因有物。有物因有論。有物論因有愛憎取舍之不齊。而是非出焉。古今人往往囿此而不能脫也。其纏縛處則言爲之端。人之有言如天地之有風。風麗木則因竅發聲。而樹竅不同。似鼻似口似耳似枅似圈似臼似洼似汚。有此八形。風聲不同。激者謫者叱者吸者呬。

者。諫者。突者。咬者。有此八響。大塊以清寧爲撰。而風發于怒號。故其籟萬有不齊。人以玄默爲宗。而言發于擬議。卜度之煩。故其籟亦萬有不齊。縱不齊之極。而其所從起。所從止。只爭是非二字。是非因我而生。我形不化。我心不忘。則妄許以爲是。妄拒以爲非。迷謬惑溺。自用其愚。而物論愈不可齊。故篇中首揭喪我。以絕其受病之根。次提出成形成心。以教人還自覓。認非若。

顏成子游稿木死灰之詰也。次提出真宰真君以破人妄見。又云莫若以明以救人迷謬惑溺之失。又云因是又云不用而寓諸庸以見自用其愚者皆脊脊多事之徒也。夫至人無我從何處喪無虧從何處成無妄從何處真無愚從何處明無擾從何處因無奇從何處庸莊生此論似已落第二義而不知此醒世之言不嫌淺露如遇田夫不講稼穡遇販夫不講貿遷而與之

言良知頓悟等語何異對牘撫絃佛家言法卽  
言非法卽言非非法言空卽言非空卽言非非  
空頻頻轉換惟恐人執着而昧者以爲精深微  
妙之旨解者則以爲轉語耳爲下下人說不得  
不如此婉轉而其實無我相卽子絕四中之所  
謂毋我是也毋我卽是喪我喪我則說生惡死  
之念息而何暇計是校非予觀世人富貴者怖  
死猶曰恐失富貴也貧賤者亦怖死安知未來

世不富貴逼人哉。卽不然。亦安往而不得貧賤。而奚以怖爲。莊生以驪姬之泣嫁爲喻。其說甚快。而予謂戚夫人。蕭淑妃。楊太真。其初嫁時。又未必不驪笑也。未幾爲人彘。爲骨。醉爲縊于馬。鬼三姬悔嫁時之笑。不異驪姬之悔其泣也。明此可以悟是非之無憑矣。是非關切于我。而與人爭已屬刃。劓。搆。鬪之私。至于審仁暴者。辯堯桀之是非。區善利者。辯舜跖之是非。衡報復者。

辯。是。越。之。是。非。權。從。衡。者。辯。蘇。張。之。是。非。分。門。  
戶。者。辯。牛。李。之。是。非。談。名。理。者。辯。朱。陸。之。是。非。  
縹。紛。置。喙。如。聚。訟。然。則。益。無。謂。矣。鄭。人。稱。與。黃。  
帝。之。兄。同。年。相。爭。而。不。決。古。今。之。是。非。皆。此。類。  
也。物。論。樊。然。而。不。齊。大。率。以。鉅。細。修。短。分。別。起。  
見。故。莊。生。又。以。莫。大。于。秋。毫。而。泰。山。爲。小。莫。壽。  
于。殤。子。而。彭。祖。爲。夭。醒。之。要。其。極。則。秋。毫。之。外。  
有。微。塵。泰。山。之。外。有。崑。崙。須。彌。殤。子。之。外。有。蜉。  
蝣。



游朝菌。彭祖之外有天地。何小何大。何夭何壽。  
何不齊之有。由此推之。莫美于嫫母。而西施爲  
醜。莫馨于糞壤。而蘭蕙爲臭。莫貴于瓦礫。而珠  
玉爲賤。莫勇于阉羸。而賁育爲怯。莫險于康莊。  
而孟門爲坦。莫瑞于鴟梟。而鳳凰爲怪。莫駿于  
欵段。而兔飛爲驚。何美何醜。何馨何臭。何貴何  
賤。何勇何怯。何坦何險。何瑞何怪。何駿何驚。而  
又何不齊之有。當時道術之長。莫尊于儒墨。各

是其是各非其非相角不下。而莊生蔑其道爲小成等其言爲榮華。則其他方伎之流無甚懸殊。悉可置不論矣。惠子與莊生同時斤斤以堅白自命。乃專好議論是非之人。故莊生忽作自疑之狀。曰。今且有言如此。不知與彼類否。又曰。雖然。請嘗言之。可也。亂天下之道術者。議論也多。不如省喋。不如默。古人說啼得血流無用處。不如緘口過殘春。聖人只不議。不論。已超越尋

常萬萬矣。守此則爲葆光。休此則爲天鈞。和此則爲天倪。知此則爲天府。天而可以是非。封畛之乎。齧缺三問。王倪以知。王倪三答。以不知。至人之真知。空空洞洞。非可私意揣合。而人于其間。強生執着。執着生分別。分別生顛倒。卽就是非。論之祇隨衆轉徙。而在豕原。無特操是之謂有待。而然罔兩問景。譏其行止不得自由。蓋切譬也。果爾則真我喪。而形骸軀殼之我。反存昏。

昏。泪。泪。如。濃。睡。之。不。醒。長。眠。之。無。旦。誠。可。哀。也。  
人。生。大。夢。故。莊。生。卽。與。說。夢。蝴。蝶。耶。莊。周。耶。夜。  
栩栩而晝遽遽耶覺耶不覺耶覺則蝶非莊周  
不覺則莊周是蝶是非非是惟物化者任之惟  
喪我者知之試以莊周夢蝶之象合子綦隱几  
之意而物論齊矣

黃聖孩先生評○暢所欲言

養生主說

高○識○

莊子用世之才也。其書用世之書也。讀者作遺  
世觀則誤矣。文惠君曰。吾聞庖丁之言得養生  
焉。覆按之。非養生也。其言牛節有間。而牛刀無  
厚。以無厚入有間。恢恢乎遊刃有餘地。是以十  
九年之久而刃若新發。于殞與良庖族庖之割  
且折而歲月更刀者異也。有味哉斯言。蓋教用  
世君子于盤根錯節處。弗輕試其鋒。于肯綮處。

纔可下手也。以無厚入有間，則事逸而功倍。試

就古人而枚舉之：齊桓公苞茅聲罪，膠舟致討。

入楚之間也。用世者間處急須着服趙襄子肘韓康子，入智伯之間也。

范蠡用賄干宰嚭，入夫差之間也。田單譖樂毅

而以騎劫，代入燕惠王之間也。范雎以無王激

秦入穰侯之間也。漢高祖爲義帝發喪，入項羽

之間也。王允致呂布之反，噬入董卓之間也。張

仲堅立國于海外，入扶餘之間也。狄仁傑謂侄

無紂姑于太廟之理入武壘之間也李愬出蔡  
賊不意提孤軍入空堞而縛之入李光顏之間  
也王曾以山陵事獨對入丁謂之間也有間可  
入雖一投筆之班超能策勲絕域封侯萬里而  
綽有餘無間可入縱臥龍抱天民名世之畧掃  
吳魏之么魔以定三分之鼎而猶不足此卽孟  
夫子乘勢待時之說而取義于庖丁卽老氏治  
大邑若烹小鮮之旨也老氏曰國之利器不可

以示人士。君子負經濟大業。如藏器于身。苟韜之。不密。而胸臆內差。有未降之氣。眉宇間微有自旌之色。則吾意之所至。而人備焉。吾意之所不至。而人逆焉。淺陋極矣。深心大力之夫。必不如是。遽瑗之教顏闔也。先與之爲嬰兒。爲無畦町。爲無崖。而後達入于無疵。則在我操不厚之刃。而徐以待其間之自開。人不入之權。由吾掌握。莊子生于周末。四顧躊躇。無間可入。無下手。



處只得卷而懷焉。所云善刀而藏之。蓋自况也。  
學者豈真以庖丁解牛爲養生而發哉。  
聞子將先生評○會得人間二字。將千古英雄  
作用一。眼。看破如此。讀書篇篇皆用世之書也。  
豈必莊子哉。

## 人間世說

莊生以人間世名篇見世之不屬于我也。處世者還就人間而調適之。不當強立仁義道德以齟齬之也。夫莊生業已吐棄人事。弁髦人倫。而猶必舉說衛使齊。傳太子立論。蓋三者乃人間世最鉅條目。而大作用人。視爲極沒緊要。極沒關係之事。乃可以全生遠害。而不受困于世。孔子之告顏回與葉公。蘧瑗之教顏闔。皆此意也。

凡人名心未化。雖逢比不免于戮。卽忠愛發于誠懇。而驕憤骯髒之氣。露于眉睫。則彼以有物之心聽我。以有物之心鳴。兩實不能相入。必須要虛。而虛不可驟襲。柔其氣。審其機。不多開一竇。以延之。不妄投一藥。以撓之。所謂集虛也。虛則靜。靜則與世無爭。而世享和平寧一之福。所謂吉祥止止也。實則動。動則囂然紛紜。而我與世各不安其性命之情。所謂坐馳也。以義命二。

牢奪人悅。生惡死之念。生死關破。則陰陽人道之患俱息。而內熱飲冰。可發一笑。葉公子高。看得奉使傳言。乃天下最難之事。夫子詔以無傳。其溢言以敵國之復我者。仍以復君。則自不致構釁而挑禍。此使職亦使體也。有何難哉。大凡傳言者。不但傳兩怒之言。足生戈矛。卽傳兩喜之言。亦傷和氣。故交譽之詞。翩翩于媒妁之口。而男女之物。而不化者。畢世相怨。無窮期也。所

謂傳言者殃也。雖然，顏子、葉公一以說，一以使，皆事人者也。至若顏闔傳太子，則教人矣。形就心和，猶非極則，必與之爲嬰兒，爲無町畦，爲無崖，而達之入于無疵，可見人間世無一事一物不當用。巽順之卽猛如虎，而與人媚逆之卽馴如馬，而有缺銜碎首之虞。況人主雖剛暴不猛，于虎雖庸愚不馴于馬，而可以悻悻之氣使哉？爲嬰兒爲無町畦爲無崖，分明是鄉愿一流人。

物而喫緊處全在末一着達之入于無疵子革  
之于楚靈王若非摩厲以須寄諷于左史倚相  
而誦祈招之詩以悚王心則向所云與君王畏  
君王者特巧爲逢而不顯其作用之妙矣世人  
胸中極窄而偏裝出大模樣極呆而慣弄些小  
機械油唇滑舌伶牙俐齒道自己十分有用據  
有道者觀之反不如櫟社之散材商丘之惡木  
壽而免于剪反不如白穎之牛亢鼻之豚痔病

乏人。巫祝目爲不祥。而得免于患。反不如支離  
疏以殘疾故。非惟徵發不及。且受賑焉。樂餘生  
以終其天年。則信乎巧者災之門。而拙者慶之  
府已。要之社材丘木。縱不堪棟梁。供燎爨。則有  
餘矣。牛顙雖白。可駕可耕。豚雖亢。可鼎俎。人  
雖痔。且支可給城旦舂鬼薪之役。斯數者未必  
無所用之。莊生特描寫出無用光景。以醒世之  
硜硜者。非真欲爲絕物。而自棄于人間世也。人

皆知有用之用而不知無用之用。蓋有用之用其用小。無用之用其用大。有用之用其用拘。無用之用其用化。觀莊生此論則一段用世精神有沒世不磨者。但不輕于一試而古今人遂以放浪目之。可哀也。夫接輿諷孔而尊之爲鳳凰。瑞鳥也。希世之祥。非用世之物。不足以擬孔子。必也其龍乎。天飛則蒸爲雲雨。泥蟠則潤及江河。然大易稱羣龍無首。夫龍已神矣。并其首而



無之則或潛或見或惕或躍或飛或亢有變化  
于無倪者是所謂無用之用也抱龍德而處人  
間世自孔老外疇其當之哉

德克符說

古有以殘體惡疾而得僊者。而僊人亦時幻殘體惡疾以玩世。則是外之四大六根與內之神識判乎其不相及也。莊生人間世篇述支離疏以奇醜得終天年。猶形焉已耳。况支離其德者無用爲用。豈不自全而有餘哉。此篇備舉形之陋惡者以廣之。曰王骀曰申徒嘉曰叔山無趾。皆兀者也。而一則從游甚多。與孔子中分魯其

門人虛往而實歸一則與子產同事伯昏無人  
以不全足鄙夷執政之全足令子產蹙然改容  
更貌一則踵見仲尼務學以補前行之惡而有  
桎梏天刑之論則是天下之至人絕不于形相  
肢節間較完缺也魯哀公之悅哀駘它衛靈公  
之悅闔鼓支離無脈齊桓公之悅甕菴大癭三  
君皆不知其然而然所謂才全而德不形者破  
死生存亡窮達貧富賢不肖毀譽飢渴寒暑之

關一一任其自然不以滑吾和而仍復退藏于  
微密之地不爲崖異如水至平盡泯其高下之  
迹令人睽就而不捨此卽是德有所長而形有  
所忘以故視全人之脰翻肩肩然細削而不適  
于目夫魯哀公雖中主乎猶知師尊尼父至于  
衛靈公寵彌子瑕惑南子齊桓公內嬖如夫人  
者六又有豎刁諸人俱好好色之君也而亦悅  
此陋惡之人可見天下之至人絕不干形相肢

節間較完缺也。莊生看得世間盡是四大不全。六根不具之人如楞嚴經所說日月燈光顯色。我目因之能視則見性不存。雖有目與瞽無異。一切口耳鼻舌身意皆如目。然而人反不覺其虧欠。觀一軀殼不完者。竊竊焉笑之。憐之。故曰。不忘其所忘而忘其所不忘。此卽孟子指不若人。則知惡之心不若人。則不知惡。此之謂不知。顯也。士之有道而殘其形者。洵不足爲詬病。又

有一種詭譎陰險之人。自詐其計。自誇其局。自  
多其獲。自雄其成。形質既劣。而情復肖之。故莊  
生又引聖人有所游。而知爲孽。約爲膠。德爲接  
工。爲商。聖人不謀惡用。知不斲惡用。膠無喪惡  
用。德不貨惡用。商準之。蓋惟恐人之溺于好惡  
而以情自錮也。且教以因其自然。而不益生也。  
惠子不得其解。而曰無情。何以爲人。曰不益生。  
何以有其身。陋矣哉。倚樹據梧之見。烏足語德。

充之符乎符者操券于此合契于彼卽兀者惡  
人之能動衆悅俗而在我亦無疑沮是也彼郤  
克之于齊以跛足受辱讐麋之于楚以鑿肘致  
討。華元睥目。蹇腹。貽譏。謳者。蔡澤曷鼻。雕顏。見  
笑。唐舉甚至伍胥。魏武皆人傑也。重帷而見公  
子光。自猜其貌。捉刀以代。崔季珪欲掩其醜。况  
凡庸者乎。後之兀者如謝靈運。習鑿齒之流。何  
可勝數。德之不充。雖支離其形。曷益哉。

## 大宗師

是篇專要人透徹生死關頭。世之箋箋者。識浮生爲假合。卽自云達矣。究而言之。夫豈特生是假。死亦是假。生死旣假。則所謂知生知死者。亦假。而其人亦與之俱假。故曰有真人而後有真知。真知于何處見。不知悅生。不知惡死。是也。夫知有生而不悅。知有死而不惡。則情與人殊。未真也。惟不知有生。不知有死。則悅惡兩念無從



芽蘖然人受此成形自母腹中血肉胞孕而來。豈不是生。魂魄飛散而去。豈不是死。而所以生。所以死者。皆非我也。命也。命操主張生死之權。所謂大宗師也。篇中大塊二字。凡兩見。造物二字。凡四見。造化二字。凡三見。以見生生死死。命寔爲之。其附贅縣疣。我不能幻之。使無其決疣潰癰。我不能留之。使有其左臂化鷄。右臂化彈。我不能執之。使不遷。其夢鳥厲天。夢魚沒淵。我

不能覺之使不亂。任亭毒之顛倒而茫然失其所持。猶游魚煦沫于泉涸之餘。無以自潤。縱悅生而有所不得。惡死而有所不免。彭殤等盡。豈不悲哉。莊子提出命來醒世。只緣世人是非毀譽得喪榮枯修悖延促等相。皆從生死來而生。死皆從命來。命徹則無所不徹。此卽牧羊鞭後之旨也。世人聞說有命。便欲安命爲躍冶之金。又欲衡命。如是將聽之已乎。善吾生者乃所以

善吾死。莊生却教人下手處也。善字極妙。最難摹擬。與列子御風而行冷然善也。神雖王弗善也。畧相似。吾字亦有說。釋典云亦無身心受彼生死。夫釋以生死付之彼。而莊生以生死屬之吾。蓋凡人不可有我。而于生死則不可不識認。我篇中所謂况其卓乎。况其真乎者。是也。凡夫貪生怕死。然劉聰聞當爲須遮國王。則不懼死。韓擒虎聞當爲閻羅王。亦不懼死。非人之愛富。

貴○反○甚○于○生○惡○貧○賤○反○甚○于○死○也○彼○誤○認○以○爲○  
卓○且○真○焉○而○未○善○也○賈○誼○云○生○爲○明○帝○歿○爲○明○  
神○這○不○是○善○吾○生○乃○所○以○善○吾○死○的○榜○樣○然○善○  
生○善○死○各○因○其○量○卽○如○廣○成○子○軒○轅○黃○帝○太○上○  
老○君○死○後○與○天○壤○齊○不○朽○而○生○前○所○作○還○爲○死○  
後○所○受○之○根○等○而○下○之○伍○員○之○素○車○白○馬○潮○頭○  
往○來○關○羽○之○鹽○池○顯○赫○陰○擊○蚩○尤○始○終○以○忠○義○  
著○未○有○亂○臣○賊○子○耿耿○轟○轟○千○秋○血○食○者○也○不○

悅生而未嘗不生。不惡死而寔未嘗死。命且柰  
何哉。生死倪于命。後我則立于命。先生死。範于  
命。中我則超于命。表所謂自本自根者是也。篇  
中。稀韋氏得之以挈天地。至傳說得之以相武  
丁。騎箕尾爲列星。凡十三个得之。而所得者何  
物。道也。道爲命之權輿。所謂大宗師也。儒家以  
命爲歸復之地。而老莊則直從命處進步。故其  
理勝其說。長玄之又玄。標百氏而定一尊。自有

真正脉絡。而後世以吐納之小術當之。左矣。仙  
有十種報盡。不免散入諸趣。猶未了却生死。此  
與終其天年而不中道夭者。所差無幾。故莊生  
稱之爲至爲盛。而隨下一轉語云。雖然有患。夫  
無生無死。朗然獨惺于天地之間。而不爲命所  
限制。不爲命所汨沉。則奚患哉。非執道要之柄  
以游于無窮。不能如是。還以歸之真人。而世之  
爲真人者。蓋寡矣。

## 應帝王說

前六篇所包者廣此篇專論治天下當行所無事而已不尸故無擾也若設法以治之則我爲感而天下爲應以天下治天下則天下爲感而我爲應齧缺四問王倪而王倪四不知非不知也人心中空洞無物愚明皆所不受始之以非人而歸之于渾沌無形無體何思何慮卽欲擾之亦無所庸其擾也蓋民難治以其智多而上

復以智相角。泥裏洗土塊。何時清潔。故首揭四  
不知以醒夫用智者。藏仁以要人有虞氏之陋  
也。經式義度。日中始之陋也。此皆非先天本來  
故。蒲衣子以爲不及泰氏。狂接輿以爲欺德天  
下。避之如鳥鼠之避矰弋。熏鑿各不相安。其能  
治乎。無名人之不治天下。乃所以治天下也。順  
物自然。而無容私。這便是明王作用。若容私則  
有心矣。有心則不但有我相。且有人相。惟曰非



人則耳目口鼻肝膽意識一切都捐卽南郭子綦嗒焉似喪其耦稿形灰心之象也。夫然後與天爲徒。物莫能知。鄭之神巫季咸自以爲知人。生死禍福壽夭見壺子。則無所用之。蓋壺子與天爲徒。非人也。而季咸猶索之形骸之內。故其術不驗。而反走。追之不及。夫季咸亦善相者。特以相人之常法。而相非人之壺子。爲可笑耳。壺子之機有九。纔示其三。而季咸已不知所措。則

所驚以爲神者。直鄭人神之。而至人絕不以爲神也。夫人。心原無所住。示之以地。文示之以天。壤示之以太冲。莫勝則有所住矣。故壺子言。未始出吾宗。而季咸猶且惑焉。若夫虛而委蛇。不知誰何。則并其機而無之。譬卵朕于雄。無雄安得有卵。相本于心。無心安得有相。季咸孰從而窺測之哉。茅靡波流。茫無所據。故逃也。列子初時。醉心于季咸。泣涕沾襟。憂其師之必死。以季

咸之言告壺子。旣而駭其逃也。始悔而學道。爲妻執爨以示忍辱。食豕如食人以示平等。於事無與親以示因應。而壺子則依然太虛。不改其故。彼相大耳三藏者。不能觀忠慧國師。未後之心。卽此意也。老聃所云立乎不測而遊于無有。卽心相並遣之謂也。有心有相則實而不能靈。應至人之用心若鏡。惟其虛也。虛故寂然不動。感而遂通。蓋鏡但具照體以應妍媸。未嘗索妍。

渾沌而役吾照彼尸名府謀任事主知等皆鑿吾  
樸太虛則無竅可乘畧不受鑿是渾沌之真境  
界不容思議參焉者也視有虞氏日中始之所  
見不徑庭哉帝王應世如此而已要之可鑿可  
死卽非渾沌鑿竅七日而渾沌死此乃莊生之  
幻詞也其駢拇肱篋在宥諸篇力詆先聖仁義  
之非總不離無爲之宗者近是

卓去病先生評○世人以曠達稱莊子者膚見

也郭象彫琢箋詞以爲深奧真莊子註郭象耳  
幼宰七篇說洞精挾髓脉絡貫穿令漆園欲洩  
之旨南華不盡之意煥然光明謂之幼宰用莊  
子可也

夫子富教說

衛自武公而後國事日非州吁蒯聩猶曰親也而元咺孫林父甯殖至以臣而偪君更新臺瀆倫同車蒙醜鶴使其民桃啖其君婁豬其夫人噫康叔其衰矣不第保釐作新之澤邈不可追卽文公楚丘光宅務材訓農通商惠工敬教勸學之意薄然矣故夫子適衛而有慨也曰富之教之然吾以爲教易而富難而朱晦翁謂制田

里薄稅歛以富之。恐仲尼所以富衛者未必如此也。當時先王之井田尚在。倘更欲再制將奪諸民乎。抑取諸隣國乎。什一之規未廢。倘更欲從薄將二十取一以貊道行乎。抑別有所以裕國者乎。此其說根本孟氏而不知戰國之齊梁與春秋之衛不同。賢人有賢人之經濟。聖人有聖人之經濟。又自不同。三月而返汶陽之侵富魯之一班也。若富衛則別有神化之妙。所謂當

年累世莫殫莫窮者而區區制田里薄稅歛淺  
之乎測夫子矣



賜不受命說

受如我以物予人而人受之之受天以命畀人  
迫以不得不受之勢如命貧者不富命富者不  
貧命賤者不貴命貴者不賤命夭者不壽命壽  
者不夭之類定于有生無所趨避史遷所謂人  
能弘道無如命何者是也當受而不受孔門第  
子惟子貢能之恒人無論卽古今賢知之士貧  
賤而夭者種種矣天賦之命不由他不受而賜

出其緒餘以與之角。令造物爲無權。故難及也。釋氏稱修羅神能與天爭衡。而魔氣未降。終非正覺。賜之所短。但在于此。屢中烏足以病之。不然。桓僖之火。宰嚭之存。柴來由死之料。諸如此類。不可勝紀。豈夫子亦屢中爲累哉。

卓去病先生評○當受而不受。妙旨微言。

人不知而不愠說

忖學究講此書云君不我庸相不我舉我却  
不愠夫然則君庸而相舉遂足稱知我乎否所謂  
不知者不知其學也與聲名之顯晦絕不相干  
春秋時有仲尼固天下所望而震者而仲尼之  
學誰則知之自顏子而外子貢尚隔着一層故  
有莫我知之嘆而子貢反曰何爲其莫知子也  
無異痴人前說夢孟子舉宰我有若子貢之言

以爲智足以知聖其寔總歸于不知三子而果知之則顏淵死子不哭之慟矣不慍全在人不知上看出如純陽道人武昌賣墨一笏賣敝梳一个價千錢而武昌人大笑之六祖作偈受衣鉢而別駕看畢云尚未見性王右軍欲爲姚婆寫扇而姚婆恐其壞扇有難色當時純陽而語武昌人曰我仙也嚙矣六祖而語別駕曰我證果也嚙矣右軍而語姚婆曰我翰墨必傳也嚙

矣。誰則知之。不知由于境。地之隔。情可矜。憫奚  
愠之有。爲學必要到人不知。地位方是極處。故  
曰。君子爲學。而使人知之。便落鄉愿窠。皆人之  
君子。天之小人。非爲己之學矣。

閱孟誌說

昔孟僖子死使其子學禮于仲尼軻其苗裔耶  
淵源非一日矣然其學歷秦漢魏晉唐先後五  
季無宗者至宋仁宗景祐四年孔道輔守兗求  
其墓于鄒之四基山建廟立碑而泰山孫明復  
爲之記自此以後金元代相崇尚或加公爵或  
祭用樂章或卹其子孫或修其祠墳或增構書  
社至我 國朝孟之于孔不啻長庚之于二曜

何炳烺也。而先朝湮滅者。且千有餘年。諸儒互有指摘。王充刺孟。馮休刪孟。司馬公疑孟。李泰伯非孟。晁以道詆孟。黃次伋評孟。說人人殊。卽楊雄韓愈相繼表章。要特人臣而非人主。若孔子則漢高帝以太牢祀。而郭威且下拜矣。其故安在。予曰。孟子議論之儒。以師道覺世者也。孔子柄魯三月。墮都却萊歸。侵績效屢著。令人安得不心折哉。孟子雖性善夜氣。眸子之說發先

聖所未發而功不顯于齊梁滕亦旋滅識者謂其迂遠而闊事情故棄耳宋儒以議論勝其說皆本孟氏而推廣之以故尊孟特甚顧南渡而後虜偏門庭事勢孔棘猶諄諄辨程頤王安石之學術此與百官戎服講老何異蓋師孟而失焉者也夫儒至于今敝極矣後之君子儻復濫觴于議論而訖無成功則儒效不彰孔氏之真脉漸斬百世而下安知無效尤祖龍者哉抑又



有疑焉孟語雜見于他子者甚多豈後人所附會耶抑經秦火散佚無傳如劉歆趙岐應劭輩所云中外共十一篇今止中七篇存耶今皆無考闕之以俟來者

黃聖孩先生評○孔門學術如政事言語治賦爲宰皆有用道學至孟子獨云性善人皆堯舜所謂言大非誇吾不信也其說愈美實效愈微宋儒之禍政學孟者貽之耳

讀離騷說

屈大夫煩冤之極故其詞怨亂亂爲樂之巧。章而臨終亦云亂命如所謂木夫九首土伯三日則相干怪所謂士女雜坐不分日夜舉酒爲驩則相干淫淫與怪皆亂也無何而沉身汨羅則看○過○好○近死之心其言豈足據哉太史公哀其志謂與日月爭光班固忌其藻麗謂爲露才揚已此以意爲低昂者也其引宓妃女岐湘夫人及女媧

有娥高辛二姚。螽山于篇。蓋專爲其姐女。頽而發。非寓言也。嗟嗟韓之聶政。身受其克。姐驩其義。唐狄仁傑之姐。有子而羞事女。主賢矣哉。屈○引○而○賢○姐○作○証○見○原○所○遇○原之姐。偏申申其罵。余雖所遭不幸。而心煩意亂之際。何以堪之。原卽有百身。應盡葬江魚之腹矣。

黃聖孩先生評○非深于騷者不能爲此說

齊人說

孟子在齊最久稔知齊人情態故以素所極詆  
之陳仲子而必以之爲巨擘則齊無人矣彼蓋  
相激之極而相矯之甚予讀夢葵遺仲子文甚清刻類蓋先人諸  
篇知其非獲已也然則孟子所云齊人蓋陰有  
所指非虛摹者聖賢宅心長厚不忍直斥後世  
反以爲寓言耳齊人行同乞人原非乞人也假  
令他蓬首垢面衣不掩形則國中自無與譚之

人富貴自無飲食之及其妻不必瞰也。又令他出入有童僕隨行。則在外光景可偵而知其妻亦不必瞰也。只因他衣裳楚楚。威儀棣棣。偉然丈夫。踪跡詭秘。如鬼域不可方物。故疑特甚耳。孟子指他敗露處。全在未嘗有顯者來。卽如今人鎮日奔走富貴之門。倏而蘭省。倏而梓澤。以糊其口。而富貴人經年不履其庭者。比比皆是。不獨齊人。齊人旦出晚還。家食時頗少有室而

又有中庭蓋原以待顯者之來也特顯者自不  
來耳亦實飲食于富貴之家特富貴之家不常  
常飲食之耳不然四孟二至祭有常期齊人安  
得日日醉飽于墦間哉偶爾妻瞰之時正郭外  
舉祭之時齊人數奇被妻窺破卽齊人自百口  
莫解此千古一大冤案也然亦是自取何也惟  
其他平日對妻妾說得與顯者萬分莫逆愚婦  
人見識沾滯計無復之下此毒手把天下古今

這一等曖昧之局。一一描寫出來。孟子借以垂戒。如何又好著他姓名。世儒誤認齊人。果是乞人。所以疑他無妻妾。又疑孟子寓言而不知乞非乞。丐之乞。誅其心。若乞丐。顏之厚。若乞丐耳。餘非餽餘之餘。卽農有餘粟。女有餘布之餘。人將不食吾餘之餘。卽又顧之他。亦是人頻頻留渠頻頻起。此處辭脫彼處邀住。酒酣以往。意夷不禁。想齊人在顯者前。未必不耳熱欲狂。何嘗

有意驕其妻妾故作施施之容乎嗟乎此仲子之所以食糟李也乃齊人之妻與仲子之妻則皆賢婦人也

長卿再弋○孔孟真脉一耻字盡之忠臣義士孝子節婦只是一个有耻盜賊乞丐娼妓只是一个無耻夫子曰行已有耻可見子貢獨少此耳近世鄙夷人而賤惡之輒詛其餓死不知窮餓而死如採山薇食井李却嗟來皆千古有數



人物不可多得。試觀目前。孰是甘餓死者乎。大丈夫挾竒處世。必不到餓死地位。而介性所至。有可以餓死之理之勢。方是有耻。方不墮于齊人。若纖微錯認。縱免爲富貴利達中之齊人。而不免爲名教中之齊人矣。

黃聖孩先生評○悶時讀一過。無不大笑絕倒。徐楚白先生評○今日齊人最多。齊人之妻妾。却少。不惟不能泣。且不能疑矣。凡畫馬者。胸中。

具有成馬故落筆處悉肖天機想幼宰胸中有  
一齊人方能如是之肖

以貌取人

澹臺子羽貌陋故仲尼曰以貌取人失之子羽  
蓋抑揚其詞以褒之非真失也鄭然明貌不颯  
從使之收器者以觀叔向而立于堂下叔向執  
其手以上曰子若無言吾幾失子矣蓋同調之  
人精神相感在聲音笑貌之外卽然明終于無  
言叔向亦必知之所謂傾蓋如故者此也不然  
牀頭捉刀人真英雄也魏武帝未嘗有言而一

段魁岸之氣如帷燈室劍隱隱躍躍終不可掩。豈以叔向之智而顧出一夷虜下哉。

徐楚白先生評○以貌取人正謂貌不足以取人也不知言無以知人若果知人卽無言亦自知之矣

# 四書傳疑

廐焚與馮婦章已經昔人剖破獨南宮适章尚有說據愚見俱不得其死爲一句然字連下禹稷爲妥與若由也不得其死然不同蓋然者疑詞由未死而逆料之故加一然字。羿奡已死不必用疑詞也。將然字連下作轉語把羿奡禹稷相較把死與有天下相較更覺有情。朱註寒浞殺羿本史記而孟子言逢蒙殺羿豈一羿而兩

太其殺之乎。抑原有兩羿耶。王逸註楚詞云。寒  
浞使逢蒙殺羿。牽合附會。無可考証。闕疑可也。

無德不報

昔秦穆公寬盜駿之人而飲以酒楚莊王泯絕  
纓之跡而宥其愆趙盾餉餓夫于翳桑袁盎贖  
侍兒于從史其初皆施恩不報之地而後賴以  
解圍脫難善哉唐張說之言曰活人于死者必  
捨生以殉危榮人于辱者必盡節以雪耻詩所  
謂無德不報也夫酬恩報德非庸衆所能固千  
百○中○之○一○二○僅○垂○史○冊○者○而○乃○得○之○盜○賊○乞○丐○

淫穢之徒。則是盜賊乞丐。淫穢之中間有賢人。君子存也。予偶閱說苑載此四事。而揭之以爲學者養量之助。

卓去病先生評○天下亦有號爲士人而不能報者。如到溉不報彥昇。王陶不報姜愚。千古薄行之甚。惟盜賊能施張齊賢之所遇。是也。惟盜賊能報秦穆盜駿之人。是也。士紳不及久矣。黃聖孩先生評○盜賊乞丐淫穢之人。其報始



盡負恩背義往往出於富貴衣冠可痛可恨  
徐楚白先生評○張說還是古人故持論甚平  
今則活人于死者或自取其死榮人于辱者或  
自致其辱以德報德分毫不爽此非聖人不能

殉葬

輔氏之役晉獲杜回秦之力人也魏顆見老人  
結草以亢杜回杜回躓而顛遂獲之夜夢老人  
云汝從先人之治命嫁吾女而弗殉吾是以報  
果爾則陰騭確有據矣乃黃鳥痛三良之莫贖  
則是康公從穆之亂命也按秦武公以六十六  
人殉而穆公用百七十七人子車氏與焉始皇  
之葬後宮悉令從死工匠生閉墓中此與君主

妻河之事同。俱戎俗也。然秦無怪徵妖夢可駭。則老人結草之說。近誕。余謂此左氏好生之心。蓋權教也。檀弓載陳子亢之言曰。殉葬非禮也。得已則已。不得已。孰若妻與宰。於是弗果用此。非仁術哉。漢西門豹治鄴。挽河伯娶婦之俗。而投巫焉。以神明稱其作用。寔昉是。

黃聖孩先生評○不必在佛氏而有因果之說矣

徐楚白先生評○以左氏爲權教固是妙論然  
當時秦所以致亡之道不一卽謂二世而亡爲  
殉葬之報亦可也

世風升降

賈長沙云借婦耰鋤而有德色舉以証世風之薄自今日觀之色且恚矣有德色者猶賢婦也孟子以所識窮乏者德我與宮室之美妻妾之奉較論若一切可已之事予謂施恩布德在古爲迂濶無當于今則稱高誼矣今之時不第功名人不可得卽志于富貴之人亦邈不可得荀子有言離其故鄉仕君而達率遇故人曾無舊

言吾耻之觀此則所識窮乏者德我洵難能哉  
夫荀與孟皆周末人也相去不遠而人情亦已  
大異況今日哉

天道

天道好生。故伐暴救民者。享國最久。湯放桀。亳  
祚六百餘年。武王誅紂。洛祚八百餘年。漢高帝  
鋤秦蹙項。炎祚四百餘年。天道好還。故一旅興  
夏。三戶亡秦。天道忌盈。故桓文獨盛于五霸。而  
齊有田氏之篡。晉有韓魏趙之篡。齊晉先秦楚  
燕而速亡。夫差伐楚。伐齊伐越。與晉爭長。滿而  
難持。吳亦速亡。天道忌巧。故名過其實者無後。

陰謀者不善終。孟嘗君絕祀于薛。呂不韋飲鴆而死。俱造物所默仇也。



孤介

孔仲山家貧奉親變姓名傭爲新野縣街卒荊  
州刺史范巨卿行部縣選仲山爲導騎巨卿見  
之驚捉臂曰子非孔仲山耶吾昔與子俱曳長  
裾遊太學吾蒙國恩致位牧伯而子懷道隱身  
處於此乎仲山曰侯嬴甘心於賤業晨門肆志  
於抱關豈爲鄙哉巨卿敕縣代仲山仲山竟不  
肯去徐孺子會葬黃瓊于江夏無資以達齎磨

鏡具自隨所在取直然後得前古人之介性如此夫以命世之英而不羞爲僕役之賤以糊其口由斯以觀范史雲還麥于尹臺王修齡辭粟于陶範閔仲叔邵猪肝于安邑令未足多也鳳凰翔于千仞之上而羞與燕雀爲羣能高而不能下是卽其所短也神龍則不然有時而爲蜿蟺孔仲山徐孺子其抱龍德而隱者乎予同邑先達胡端敏公世寧爲諸生時貧甚販草履自

給有富室臧獲取履入無意償之胡候良久日  
已晡矣主人得其情謝過延入餉之胡但取值  
不顧而去後秉憲豫章首發逆濠之姦得罪遠  
戍事白居易九列收得赫然以名臣稱

了悟

禪家以智爲上首一悟則能事已畢故聖門有修後之悟行後之知不惑知天命從能立而進者是也宋儒知行序進是下一層事猶禪家之有始教小教也俗學謂卽粗卽精卽上卽下妙合而不容分割此皆糊塗影響之說子曰中人以下不可以語上也可見聖學實實有个上但聞者根器不同領畧亦異有解有不解耳得其

解則精神暢悅。是以迦葉之聞天樂。雖定中猶  
爲起舞。昧其解則聾者與鐘鼓無緣。是以佛說  
妙法會中。非大賢聖圓覺卽十方菩薩而法華  
座上。聲聞之退去者。猶且五千。由斯以觀。語上  
豈易言耶。

陰德

名者造物之所忌也。故曰名過其實者無後世。  
見善人無後遂致疑于造物以爲報施之爽而。  
不知享名太過則固已償之矣。富貴爵祿壽考。  
子姓造物不靳與人而于名若有所靳。帝力何。  
有堯之無名也。猶且丹朱之不肖。喪家之譏孰。  
殺之謗孔之無名也。猶且歷聘周流困窮以老。  
况下焉者乎。士大夫損德處多由立名心太急。  
刺心錯言

古○有○以○善○念○而○行○惡○事○者○王○安○石○之○新○法○是○也。  
○千○古○獨○初○  
有○以○惡○念○而○行○善○事○者○秦○檜○之○和○議○是○也○若○以  
陰○德○論○則○秦○與○王○大○有○間○矣○予○意○居○官○者○遇○他  
人○性○命○前○程○卽○冒○不○諱○之○名○以○保○全○之○鬼○神○必  
有○能○默○諒○者○夫○我○本○無○爲○而○爲○而○以○善○事○蒙○惡  
聲○爲○清○議○所○擯○不○惟○鬼○神○諒○我○而○我○心○原○自○泰  
然○若○片○長○寸○美○舉○世○抽○揚○儘○足○以○銷○折○其○福○故  
與○人○有○讐○者○不○當○用○詛○而○當○用○頌○卽○如○舉○子○業

小技耳。名士每每晚發位。每不顯何也。以齒牙  
嚙餘。而令人口誦手披。咀嚼玩味。滅福多矣。然  
名心難割。新莽之世。有謬與寡嫂爭財。涉訟以  
自汙者。此說名之術斯逃名之士乎。名心破而後。可與爲善。  
而說者顧謂三代而下。惟恐不好名。夫好名之  
人。壹意避嫌。見溺不救。其中微睨。而叵測名心。  
破則爲惡。真爲善亦真。古人云。積陰德于冥冥  
之中。以爲子孫長久之計者。定非好名之人所



能勉也。

長卿再弋○或云以秦檜和議爲善事則兩河父老所謂相公去我輩無噍類者孰殺之耶予曰佳兵不祥岳飛廣德鄆城朱仙鎮之捷所枯者寧止萬骨乎爭地以戰殺人盈野孟氏亦云戎首不獨二氏教也讀蘇子瞻代張方平諫用兵書翻然動好生之念父老留飛之詞不必泥也

卓去病先生評○好名之人一意避嫌見溺不  
救其心甚毒其行甚險名心破則爲善真此至  
言也

聞子將先生評○文人當各寫一通置之座右  
君平有言成我名者殺我身可懼哉

世講

馬伏波援有疾梁松來候拜于床下不答諸子  
問曰帝婿貴重何不爲禮伏波曰我乃松父友  
雖貴何得失其序侯司徒霸欲與王仲回交仲  
回被徵霸遣子昱候於道左迎拜車前仲回下  
答之昱曰大人欲交于君何爲見拜仲回曰君  
房有是言丹未之許也古人世講之不苟如此  
今人動輒投通家小姪刺慣稱老伯老叔亦可

笑極矣交道之濫觴以此

洪泌

鄒之君有好髯者郎中左右服髭之藥幾遍後  
忽好少旋睥視之則鉗鑷都盡此非寓言蓋實  
有是事也史載趙楷嗅君集之馬膿張岌承薛  
師之轡鐙郭弘霸嘗元忠之便液宋之問捧張  
易之之溺器閻朝隱爲則天祈禳身代犧牲沐  
浴伏于俎盤趙履溫爲安樂公主背挽金犢車  
張易之謂宰相楊再思面似高麗再思遂剪殺

綴巾上反披紫袍爲高麗舞諸佞人備極醜態。  
皆唐室之宰官也。西漢崇經術東漢尚節義晉  
重門第卽間有不肖不狼狽若是一代之風聲  
氣習惟上所轉盍慎其導之之鵠乎。

防諂

書曰巧言令色孔壬仲尼曰巧言令色足恭左丘明耻之丘亦耻之皆諂也朱元晦以爲甚于穿窬故可耻夫穿窬也而不當防乎世間人落難合者澹然無求者也甘詞厚貌柔滑如繞指其胸中曖昧而荆棘思有所深中于我也太史公云自含血戴角之獸見犯則校况人懷好惡喜怒之性哉狐卑身而伏以伺傲者鷲將搏

先歛其翼。勾踐曾用此術。以沼吳矣。射指墮履之讐。翻然甘爲嘗糞。而不恤夫差方囂然自驕。而子胥恚且懼焉。此之謂藏險于媚媚者。天地之淫氣也。清和栗烈。天地之正氣也。陽亢而燠。燠極而蒸。則必有疾風暴雨。轟雷擊電。隨之。甚則瘡痍瘟疫之災伏焉。真人知其然而謹持之。不使得侵。故無陰陽之患。士大夫知諧媚之中。我也。而謹持之。不使得侵。亦無人道之患。要之。



獻諂之人非愚鈍無識者也探縉紳先生意旨而中之如吾所重在氣節彼卽飾氣節語狀獻諂吾所重在名高彼卽飾名高語狀獻諂吾所重在逍遙彼卽飾逍遙語狀獻諂吾所重在勲猷建豎彼卽飾勲猷建豎語狀獻諂吾所重在富貴利達彼卽飾富貴利達語狀獻諂吾所重在方外縉羽彼卽飾方外縉羽語狀獻諂吾無所不重彼無所不飾吾所嫉在此而彼貶異人

與同類吾所驩在此而彼褒異事與同功吾退而察之而彼背無違言吾順而試之而彼時有匡救若然者漆園所謂以無厚入有間而彼譎用之也其工于用諂者趨勢之念什一媒利之念什九士大夫不可不深防也不深防則生平盡爲所敗壞而不覺爲邦者以遠佞爲戒而士大夫反近之耶

徐楚白先生評○獻諂非愚鈍所能奸諂則賢

愚俱不免矣

死氏之說

觀西

五九

風裁

陳蕃守豫章特設一榻以待徐穉守樂安特設一榻以待周璆去卽收之未嘗濫及他客榻之不輕設也如是管寧與華歆割席分坐劉琨對孔邇舉席自隔席之不輕共也如是張敷不喜見要人遇狄當周赴呼左右曰移吾坐遠客紀僧真係齊世祖偉臣江敷見之命左右曰移我床遠客董昭枕蘇則膝臥則推下之曰蘇則膝

非佞人枕張僧胤候羊侃侃竟拒之曰吾床非  
闍人所坐說者曰古人過自標榜而不知從古  
至今惟此數事稍覺崖異流傳青史則其他涇  
渭不分者儘多卽就數子而論如陳蕃之收榻  
必有不自揣之人欲登其榻故須急收耳倘歆  
與邊亦自揣則席可無割且隔也坐與床之遠  
客亦客先偏近之而始徙避焉至于枕膝而後  
推下來候而後峻拒晚矣斯數者或以爲矯激

或以爲孤高。以吾論之。特傭中佼佼之徒歟。今  
之。人。長。厚。自。命。欲。覓。一。分。別。善。惡。黑。白。者。而。不。  
稍。概。見。何。韓。魏。公。之。多。也。

沈無回先生評○今人只是好言中行便有此  
病

# 食癖

楞嚴經云一切衆生皆依食住故牛羊馬芻食  
犬肉食鷄猪等穀食猫腥食設令矯易而飼之  
不相習矣而人則否予親見婢僕中有食泥者  
有食炭者有食頭髮食瓦松者以爲病耶則容  
色如故後亦竟不藥而愈殊不可解乃知劉邕  
嗜茄日撲數僮以給其欲鮮于叔明好食臭虫  
日覓數升啖之權長孺好食人爪餉之者忻然

如獲千金張懷肅任正皆好食人精未爲怪也  
夫食色性也在食如此色更甚焉世之爲登徒  
子者不少矣莊生哀駘它之說宋人眇媚之傳  
豈喻也哉



戒浮薄

今之少年日趨浮薄見先進肆然無禮詩刺芄  
蘭孔懲闕黨亦未必如是之濫觴也予初入庠  
序卽痛絕此輩不與交涉此輩嫉予如讐或勸  
予調之以弭其謗予終不以爲然蓋性情氷炭  
難以強合姑枚舉二三以概之禮曰倍年以長  
則父事十年以長則肩隨今有弱冠之徒去老  
成人不啻二三十齡而東帖稱謂間輒鴈行之

傭書之流因而效尤。儒冠儒服居然與我輩提  
提左避是爲少長無序貴賤無章豈厚道乎俗  
之浮薄者一也。鄉閭中非無割股廬墓之孝子  
還遺金却奔女之義士娶瞽婦膳貧友之仁人  
此輩捫舌不談偏毛舉他人之隱過以快唇吻  
或好傳人死或詆其閨醜百無一實以謊證謊  
甚則設誓以誣之又甚則造爲歌謠編爲雜劇  
以播揚之豈厚道乎俗之浮薄者二也。呼貂璫

之廝役則號而不名呼桑梓之縉紳則名而不  
號市井小民羶慕銅臭無怪其然吾黨斯文亦  
復如是豈厚道乎俗之浮薄者三也予量窄而  
不能容嫉惡太嚴亦其所短此輩聞予此論痛  
恨入骨舉人世極惡之罪展轉相加予不恤也  
予諄諄勸戒惟願其猛然知非翻然改過反澆  
習而還于長厚予且師尊之不暇其絕之耶蘇  
子瞻曰國運之所以靈長者在風俗之厚薄不

在乎富與貧。予切論謂世富則風俗自厚。世貧則風俗寢薄。安得菽粟如水火。黃金與土同價。而挽此旣敝之俗哉。

長卿再弋。○浮薄中口業第一。劉貢父滑稽善謔。毒甚刀兵。晚年得惡疾。王景亮結社相嘲號猪嘴關。而爲呂惠卿所中。傷舉社。齏粉黃魯直好作艷語。而秀公以爲當受泥犁業。報世之君子慎矣哉。人禍天刑。可爲猛省。

事有快心者三

晉人入曹數其不用僖負羈而乘軒者三百人  
事之快心者一也越王勾踐破吳而誅伯嚭責  
其賣國與已比周事之快心者二也來俊臣于  
周興卽以其法治之請公入甕事之快心者三  
也

事有矯情者三

漢高帝與雍齒有讐。欲息沙中偶語而侯之事之。矯情者一也。韓信召二惡少年所嘗辱已者。各予百金。恥其曩時之不能殺而自掩其怯事之。矯情者二也。韓安國爲獄吏所窘。不堪之甚。曰。死灰寧不復燃乎。曰。燃卽溺之後復爵。獄吏請死。安國曰。公等寧足與較乎。時人服其雅量。事之矯情者三也。

長卿再弋○只因兩韓公自附雅量長了千古  
才風後來豪傑受這些愚頑的人許多煩惱其  
實我身困苦于人何與縱不望物色塵埃中何  
至橫逆相加亦深可痛恨後之君子便量窄些  
也不妨

卓去病先生評○人當貧賤時爲人所詬辱不  
知其几而一朝得意又自附于雅量不較是使  
惡人得志無已也善人之受害益甚矣故君子

以直報怨爲一已泄憤者小爲衆善人羽翼者  
大爲衆善人羽翼者少爲千百世扶風教者多  
張橫渠有云報者天下之利也旨哉斯言所當  
深味



事有無可奈何者五

子嬰誅趙高在位僅四十六日酒未及濡唇餐未及下咽而真人已翔于霸上事之無可奈何者一也。司馬遷以李陵事下蠶室家貧貨賂不足。以自贖交遊莫救事之無可奈何者二也。劉盆子人畏欲啼事之無可奈何者三也。張超被圍于雍丘臧洪行跣且號束甲請舉而袁曹方睦坐視不救洪竟敗死事之無可奈何者四也。

陸秀夫張世傑抱帝入海大風覆舟事之無可奈何者五也。

長卿再弋○賈長沙罪子嬰不能任忠賢又不  
能縞素以正先帝之過其說迂甚大凡旦夕悔  
禍而卽可收土崩瓦解之勢者其先世嘗有功  
德于民者也秦然乎哉況在位日淺其及圖乎  
所謂善者無如之何正此時也長史欣留司馬  
門三日不報章邯降羽執羽手涕泣爲言趙高

則邯寔萬不得已。而誼云章邯以三軍之衆要  
市于外以謀其上。皆文人之筆也。若以臣節責  
邯則別有說。

世事不平者九

武將汗馬血戰萬死一生。襲瘡止于外衛。文臣藉口發縱指示。世官執金吾。事之不平者一也。異途得賄。名之曰賊。科目簞簞不飭。則曰交際。餽遺事之不平者二也。古人重門第。爵無崇卑。皆得任子。今甲科方面之元子。例不得補邑博。士弟子員必與齊民一體角稅。而銅臭市兒。不識章句。爲何物。翱翔胄監。居然號太學生。事之

不平者三也。舉子分南北卷。今日之主司。卽前日之舉子。而主司閱卷。獨不分南北。事之不平者四也。士中式爲朝廷所舉之人矣。旣膺職。可以沾祿。未出庠。亦得補廩。而兩皆無之。何以爲方穀之資。事之不平者五也。詞臣不膺民社。彈文而吹毛求疵。反不若外官。註誤猶有晚蓋之門。事之不平者六也。臺省作天子耳目。威尊權重。而庶吉士散館。以之爲屈。藩臬黃金橫帶。位

二千石上而兩衙門外轉以之爲褻事之不平  
可之誰可之矣  
者七也無錢買踪帽客費戴紗巾旣戴紗巾羞  
伍踪帽儉則不遜事之不平者八也縉紳衣冠  
之盜怒呵于堂上探囊發篋之寇戰栗于階前  
事之不平者九也

文人數奇

有僧相歐陽永叔耳白過面名滿天下唇不着齒無事得謗蘇子瞻生辰與韓退之相似命在斗牛奮角張口故生平風波特甚兩公之不偶或命相使然至于李青蓮捉月採石杜少陵覆舟醉沉數何奇也豈覓句太工亦遭陰譴乎大抵文人之習氣輕世傲物矢口月旦落筆雕黃不但人忌之鬼神稔忌之矣王元美曰挾造化

之秘則真宰默。警擅人羣之譽則衆心未厭。此有識之言也。而聰穎倜儻之士。見解所到。時出快心之語。如弩發機。率不及持。出不及返。原無意于傷人口業。作崇彼亦不自由爾。世間庸愚之夫與高士臭味不投。又數數犯其所忌。人衆我寡。受禍宜矣。木秀于林。風必摧之。理勢宜爾。又○噤○不○住○了○可徒諉咎于命相耶。士之文不若歐蘇詩。不如李杜者。人害天刑。可以無慮。然予有說焉。月犯



少微吳中名士。求死不得。諸公生計。旣繁。生路自遠。卽欲躋附。數奇。文人吾且柰之何也。

女人姓詐

官之墨者必酷婦之淫者必悍妬而且詐漢之  
呂唐之武概可推已戚姬之人彘蕭淑妃之骨  
醉易地皆然不足憫也近世婦人性好殺生而  
持齋詈舅姑凌夫子而念佛者不少矣春秋誅  
意其持齋念佛之意是何意耶內典云昔有四  
姓人婦與琢銀兒私通者夫覺婦殊不服夫言  
吾不汝信當與同至神所立誓婦言甚佳夫齋

七日始往婦密語琢銀兒汝詐作狂亂頭干市  
逢人抱持夫齋竟便將婦出過市琢銀兒便來  
抱持詐狂臥地婦嗥呼其夫何爲使人抱持我  
耶夫言此是狂人何須記錄夫婦俱到神所叩  
頭婦言我生不作惡但爲狂人所抱夫默然而  
慙佛曰當知一切女人奸詐如是不可信也韓  
非子載燕人李季好遠出其妻私通于士季突  
至士在內妻患之其室婦曰令公子裸而解髮

直出門吾屬佯不見也士從其計疾走出門季  
曰是何人也家室皆曰無有季曰吾見鬼乎婦  
人曰然爲之柰何曰取五姓之矢浴之季曰諾  
此與琢銀兒事相類長安之俗男女導淫之處  
名曰巢窩蓋居亭主人媒合二姓之慾而因以  
爲利者也有一武弁潛匿于此以俟桑中之期  
及期而至者卽其妻也其妻左手紐其胸右手  
捶其面且泣且罵曰吾探知汝在此特來窺破

武弁慚屈而出佛所謂一切女人奸詐如是不  
可信者豈誑語哉

輕疑

薄俗喜于造謗無兄而盜嫂少孤而不孝繼母  
三娶孤女而撾婦翁此輕信之不可也而輕疑  
亦能賈禍英布之妾歸寧有隣醫賁黑以布故  
厚款之妾數稱賁黑長者布疑之而黑告變遂  
羅赤族之誅梁杜從任西荊州刺史新納一妾  
年貌兼妙寵愛特甚妾得父書云比日困苦欲  
有求告方倚簾讀之而從自外至妾羞以父事

相聞因嚼吞之。疑情人所寄。剖腹取書。妾氣未絕。從覽訖而悔恨已無及矣。是夜見妾訴。旬日從死。此二事皆輕疑之過也。雖前生惡業。不能解脫。而二公于人情原自未透。世豈有淫婦人于夫君前讚其所私者乎。布之愚一至于此。世豈有新納之姬。恩寵方篤。而遽有外情者乎。又豈有淫詞而倚簾觀看者乎。從之愚一至于此。大凡世故不熟。人情不深。而亂用其疑。頭頭

是網士君子處帷薄之變者有孔顏之家法在  
卽揆以佛門果報之說應無有礙况妾媵所關  
甚細古人云去一姬復一姬進者是也而可如  
布從之癡迷乎



兄弟不相及說

壽朔皆宣姜所出朔譖伋而壽竊節遇盜與伋  
同死王處仲親爲叛逆其第竺法深超然獨遊  
于方外王荊公朔新法以毒宋而第安國非之  
韓絳黨附安石而第維爭之曾布敗壞善類而  
第肇移書勸之夫武攸緒之于武壘族屬猶疎  
逖也兄弟同氣而意趣端邪不翅冰炭故吾嘗  
謂柳下惠之和非得已也以盜蹠之橫暴日殺

不辜肝腦塗地而惠爲之兄誅之不得化誨懷  
服之不得坐視之又不得只得造出一局曰爾  
爲爾我爲我爾焉能免我哉蓋無可柰何之詞  
而觀者反以爲聖之和耳此之謂兄弟不相及  
也若司馬牛則不達此意而憂矣  
長卿再弋○牛惠分量迥隔一憂一不憂也象  
封而管蔡誅則罪有輕重故凡人權不君相者  
只好管得自己商所以廣牛卽惠之旨歟